

四庫全書

史部

欽定四庫全書

史部

宋史卷

三十九至
四十三

詳校官編修臣邱庭澹

洗馬臣王坦修覆勘

覆校官編修臣沈清藻

校對官監丞臣張曾炳

謄錄監生臣李錦

欽定四庫全書

宋史卷三十九

元中書右丞相總裁托克托等修

本紀第三十九

寧宗三

嘉定元年春正月戊寅右諫議大夫葉時等請梟韓侂
冑首于兩淮以謝天下不報辛巳下詔求言壬午王柟
還自河南持金人牒求韓侂冑首丙戌葉時等復請梟

侂冑首于兩淮戊子安定郡王伯耜薨壬辰以史彌遠
知樞密院事以許奕為金國通謝使二月戊申追復趙
汝愚觀文殿大學士諡忠定詔史官改紹熙以來韓侂
冑事迹壬子詔臨安府振給流民戊午責授程松果州
團練副使賓州安置是月郴州黑風峒寇羅世傳作亂
招降之三月癸酉以毛自知首論用兵奪進士第一人
恩例戊子下詔戒飭內外羣臣復秦檜王爵贈諡己丑
王柟自軍前再還行在議以韓侂冑函首易淮陝侵地

辛卯詔梟侂冑首于兩淮是春子埶生夏四月丙辰詔
後省科別羣臣奏疏可行者以聞贈彭龜年寶謨閣直
學士落李沐寶文閣學士戊午再責授陳自强復州團
練副使雷州安置仍籍其家閏月辛未置拘權安邊錢
物所壬申雨雹癸未子埶薨追封肅王謚冲靖詔大理
三衙臨安府及諸路闕雨州縣決繫囚釋杖以下甲申
詔自今視事令皇太子侍立乙酉以錢象祖兼太子少
傅衛涇雷孝友林大中並兼太子賓客辛卯以旱禱于

天地宗廟社稷癸巳減常膳乙未蠲兩浙關雨州縣貧民逋賦命大理三衙臨安府兩浙州縣決繫囚丙申辛太乙宮明慶寺禱雨丁酉以旱詔求言五月辛酉賜禮部進士鄭自成以下四百二十有六人及第出身甲子太白經天乙丑以飛蝗為災減常膳丁卯詔侍從臺諫疏奏關政監司守令條上民間利害六月庚午金人歸大散關辛未金人歸濠州乙亥衛涇罷丙子遣鄒應龍賀金主生辰甲申林大中薨乙酉以蝗禱于天地社稷

丙戌詔侍從兩省臺諫舉沿邊守臣辛卯以史彌遠兼
參知政事秋七月辛丑詔呂祖泰特補上州文學癸丑
以丘寔同知樞密院事壬戌以飛蝗為災詔三省疏奏
寬恤未盡之事八月戊辰朔發米振貧民辛未丘寔卒
甲戌命侍從臺諫兩省詳議會子折閱利害辛巳以禮
部尚書婁機同知樞密院事吏部尚書樓鑰簽書樞密
院事丙戌詔禮部侍郎許奕起居舍人曾從龍攷訂監
司守令所陳民間利害擇可行者以聞其未上者趣之

甲午發米三十萬振糶江淮流民九月辛丑金使完顏
侃喬宇入見壬子出安邊所錢一百萬緡命江淮制置
大使司糴米振饑民己未詔以和議成諭天下甲子遣
曾從龍使金賀正旦乙丑大風赦沿邊諸州冬十月丙
子以錢象祖為左丞相史彌遠為右丞相雷孝友知樞
密院事仍兼參知政事婁機參知政事樓鑰同知樞密
院事己卯褒錄慶元上書楊宏中等六人庚辰封伯祝
為安定郡王辛巳蔡璉除名配贛州牢城癸未金遣使

來賀瑞慶節十一月丙辰金主璟殂戊午史彌遠以母憂去位十二月戊辰錢象祖罷庚午四川初行當五大錢升嘉興府為嘉興軍再奪李沐三官信州居住戊寅改命曾從龍使金弔祭己卯黎州蠻畜卜寇邊己丑遣宇文紹彭使金賀即位辛卯蠲兩淮州軍二稅一年是歲江淮制置司汰雄淮軍歸農淮東揀刺八千餘人以補鎮江大軍及武鋒軍之闕淮西揀刺二萬六千餘人以為御前定武軍

二年春正月庚子詔内外有司疏陳節用之事辛丑金遣裴滿正來告哀丁巳以樓鑰參知政事御史中丞章良能同知樞密院事吏部尚書宇文紹節簽書樞密院事庚申金遣蒲察知剛來獻遺留物詔侍從兩省臺諫各舉監司郡守治行尤異者二三人二月己巳金遣使來告即位庚午黎州蠻寇邊壬午以會子折閱日甚詔侍從兩省以下各疏奏所見丁亥罷法科試經義復六場舊法戊子大風三月丙申雨雹己酉詔民以減會子

之直籍沒家財者有司立還之戊午禁兩淮官吏私買民田庚申命浙西及沿江諸州給流民病者藥辛酉罷漳泉福三州興化軍賣廢寺田壬戌出內庫錢十萬緡為臨安貧民棺槨費夏四月乙丑詔諸路監司督州縣捕蝗戊辰江淮制置司言放廬濠二州忠義軍歸農甲申賜臨安諸軍死者棺錢戊子賜楊震仲謚曰節毅五月丙申史彌遠起復丁酉以旱詔諸路監司決繫囚劾守令之貪殘者戊戌借補武訓郎羅日愿謀為變伏誅

庚子詔侍從兩省臺諫各舉監司郡守有政績才望者
二人以補郎官之闕辛丑申命州縣捕蝗癸卯詔兩淮
荆襄守令以戶口多寡為殿最乙卯釋大理三衙臨安
府兩浙州縣杖以下囚除茶鹽賞錢已未以旱詔羣臣
上封事庚申禱于天地宗廟社稷六月癸亥朔命浙西
諸州諭民種麻豆毋督其租詔臺省及諸路監司速決
滯獄戊辰奉安成肅皇后神御于景靈宮己巳遣俞應
符賀金主生辰乙酉復禱雨于天地宗廟社稷己丑命

江西福建二廣豐稔諸州糴運以給臨安仍賞其費辛
卯京湖制置司言放諸州新軍及忠義人歸農秋七月
癸巳命有司舉行寬恤之政五條乙未詔荒歉州縣七
歲以下男女聽異姓收養著為令己亥蠲信陽荆門漢
陽軍民賦壬寅命兩淮轉運司給諸州民麥種癸卯募
民以振饑免役八月甲子聽兩淮諸州民行鐵錢于沿
江八州乙丑以安丙為四川制置大使罷宣撫司甲戌
冊皇太子丁丑皇太子謁于太廟戊寅詔皇太子更名

詢己卯黎州蠻復寇邊丙戌發米十萬石振兩淮饑民
九月己亥朝獻于景靈宮庚子朝享于太廟辛丑合祭
天地于明堂大赦丙午增太學內舍生十員癸丑命吏
部郎官劉燭等審定中外所陳會子利害上于朝己未
遣費培使金賀正旦冬十月丁卯命京湖制置司募逃
卒及放散忠義以補廂禁軍闕丁丑金遣使來賀瑞慶
節己丑命兩淮轉運司給諸路民稻種減公私房廊白
地錢什之三十一月辛卯朔沔州統制張林等謀作亂

事覺貸死除名廣南羈管甲午詔浙西監司募饑民修水利乙未以歲饑罷雪宴是月郴州黑風峒寇李元礪作亂衆數萬連破吉郴諸縣詔遣荆鄂江池四州軍討之十二月甲子四川制置大使司調官軍討黎州蠻敗績己巳賜朱熹謚曰文乙亥詔諸州毋糴職田租丙戌金遣使來賀明年正旦是歲諸路旱蝗楊楚衡郴吉五州南安軍盜起

三年春正月甲辰下詔招諭羣盜又詔戒飭監司郡守

丙午雨土二月辛酉黎州蠻復寇邊庚午詔楚州武鋒
軍歲給累重錢如大軍例壬午以工部侍郎王居安知
隆興府督捕峒寇三月丁酉蠲都城及荒歉諸州民間
逋負己亥以湖南轉運判官曹彥約知潭州督捕峒寇
庚子賜彭龜年謚曰忠肅甲寅誅楚州渠賊胡海丙辰
以久雨釋兩浙州縣繫囚夏四月癸亥李元礪犯南雄
州官軍大敗乙丑決臨安繫囚釋杖以下丙寅詔監司
守臣安集泰吉二州民經賊蹂踐者戊辰出內庫錢二

十三萬緡賜臨安軍民己巳詔臨安府給細民病死者棺櫬五月乙未淮東賊悉平詔寬恤殘破州縣甲辰以去歲旱蝗百官應詔封事命兩省擇可行者以聞乙巳命沿海諸州督捕海寇戊申經理兩淮屯田庚戌以江陵忠勇軍為御前忠勇軍癸丑以久雨發米振貧民六月丁巳朔日有食之壬戌命有司舉行寬恤之政十有九條癸亥遣黃中賀金主生辰己卯加楊次山少保封永陽郡王詔三衙江上四川諸軍主帥核實軍籍欺冒

者以賊論是月池州副都統許俊江州副都統劉元鼎
與李元礪戰于江西皆不利知潭州曹彥約又與賊戰
亦為所敗賊勢愈熾秋七月辛卯申嚴圍田增廣之禁
癸卯定南班為三十員八月乙亥大風拔木是月臨安
府蝗九月丙戌朔詔三衙江上諸軍升差將校必以材
藝年勞其徇私者臺諫及制置總領劾之癸丑遣錢仲
彪使金賀正旦冬十月壬申雷金遣使來賀瑞慶節丁
丑推南雄州戰歿將士恩十一月癸巳賞楚州平賊功

乙巳遣朝臣二人往兩浙路與提舉官議收浮鹽是月
李元礪迫贛州南安軍詔以重賞募人討之十二月丙
辰詔江淮諸司嚴飭守令安集流民戊午婁機罷丙寅
湖南賊羅世傳縛李元礪以降峒寇悉平辛巳金遣使
來賀明年正旦黎州蠻請降是歲臨安紹興二府嚴衢
二州大水振之仍蠲其賦

四年春正月己丑叙州蠻攻嘉定府利店砦陷之甲辰
以四川鹽檐錢對減激賞絹一年丙午詔湖南江西諸

州經賊蹂踐者監司守臣攷縣令安集之實第其能否以聞二月乙卯李元礪伏誅壬戌羅世傳補官尋復叛辛巳罷廣西諸州牛稅閏月丁未大風辛亥詔諸路帥臣監司守令格朝廷振恤之令及盜發不即捕者重罪之三月己未臨安府振給病民死者賜棺錢丙子沔州將劉世雄等謀據仙人原作亂伏誅夏四月甲申禁兩浙福建州縣科折鹽酒己丑以吳曦沒官田租代除關外四州旱傷秋稅丙午賜黑風峒名曰效忠戊申出內

庫錢瘞疫死者貧民是月四川制置大使司置安邊司
以經制蠻事命成都路提刑李壘漳川路安撫許奕共
領之五月乙亥賜禮部進士趙建大以下四百六十有
五人及第出身六月丁亥遣余巖賀金主生辰會金國
有難不至而還減京畿囚罪一等釋杖以下辛丑更定
四川諸軍軍額秋七月壬戌太白晝見丙寅詔四川官
吏嘗受僞命者自今毋得叙用丁丑詔軍興以來爵賞
冒濫者聽自陳除其罪九月辛酉叙州蠻寇邊乙亥羅

世傳為其黨所殺丁丑遣程卓使金賀正旦詔附會開
邊得罪之人自今毋得叙用冬十月甲辰以金國有難
命江淮京湖四川制置司謹邊備十一月乙酉朔日有
食之癸丑賞平峒寇功甲戌申嚴諸軍升差之制十二
月辛巳奉議郎張鉉坐扇搖國本除名象州羈管癸未
以會子折閱不行遣官體訪江浙諸州乙巳金遣使來
賀明年正旦是歲金國有難賀生辰使不至

五年春正月己巳詔諸路通行兩浙倍役法著為令壬

申賜李好義謚曰忠壯二月壬午罷兩淮軍興以來借補官三月庚戌四川制置司遣兵分道討叙州蠻其酋米在請降戊辰以久雨詔大理三衙臨安府兩浙州縣決繫囚甲戌以廣東湖南京西盜平監司帥臣進職有差夏五月癸酉安南國王李龍翰卒以其子吳昱為安南國王詔州縣見役人毋納免役錢役滿復輸六月癸未遣傳誠賀金主生辰乙酉禁銅錢過江秋七月庚申賞降叙州蠻功戊辰以雷雨毀太廟屋避正殿減膳八

月甲戌朔御後殿復膳九月丙午太白晝見己酉有司
上續編中興禮書庚戌遵義砦夷楊煥來獻馬辛未罷
沿海諸州海船錢遣應武使金賀正旦冬十月辛巳詔
諸路總領官歲舉堪將帥者二三人安撫提刑舉可備
將材者各二人戊子金遣使來賀瑞慶節戊戌雷遣使
弔祭安南十一月庚申朝獻于景靈宮辛酉朝饗于太
廟壬戌祀天地于圜丘大赦十二月丁丑再蠲濠州租
稅一年壬午詔蠲州縣橫增稅額己亥金遣使來賀明

年正旦

六年春正月庚申宇文紹節卒詔侍從臺諫兩省官帥
守監司各舉實材二三人二月丁丑太白晝見丙戌有
司上嘉定編修吏部條法總類乙未詔宗室毋與胥吏
通姻著為令三月癸亥樓鑰罷夏四月丙子以章良能
參知政事甲午復法科試經義法雜流進納人不預五
月丁卯以旱命大理三衙臨安府決繫囚戊辰脩慶元
六年以來寬恤詔令六月乙亥詔刑部歲終上諸州未

決之獄于尚書省擇其最久者罪之丁丑遣董居義賀
金主生辰會金國亂不至而還丁亥復監司臧否守令
及監司郡守舉廉吏所知法丙申詔三衙江上諸軍主
帥各舉堪將帥者二三人八月己巳朔詔諸路監司帥
臣舉所部官吏之才行卓絕績用章著者庚午知思州
田宗範謀作亂夔州路安撫司遣兵討平之是月金人
弑其主允濟九月甲辰蠲京湖諸州逋負二十八萬餘
緡閏月戊辰朔詔御史臺置考課監司簿丙戌以金主

新立命四川謹邊備己丑詔湖北監司守令振恤旱傷
癸巳雷甲午史彌遠等上三祖下七世仙源類譜高宗
實訓皇帝玉牒會要乙未大雷丙申以雷發非時下罪
己詔冬十月丁酉朔申嚴互送之禁戊申遣真德秀賀
金主即位會金國亂不至而還庚戌遣李璫使金賀正
旦亦不至而還甲子金遣使來告即位十一月癸未虓
恨蠻寇嘉定府之中鎮砦十二月壬寅蠲瓊州丁鹽錢
癸亥金遣使來賀明年正旦是歲兩浙諸州大水振之

七年春正月丁卯朔四川制置司遣提舉皂郊博馬務
何九齡率諸將及金人戰于秦州城下敗還丁丑章良
能薨壬午沔州都統王大才斬何九齡梟首境上以其
事聞三月丁卯以安丙同知樞密院事成都府路安撫
使董居誼為四川制置使庚辰金國來督二年歲幣戊
子金人來止賀正旦使夏四月癸卯蠲福建沿海諸州
貧民納鹽五月丁丑太白經天乙酉賜禮部進士袁甫
以下五百四人及第出身六月辛丑以旱命諸路州軍

禱雨甲辰詔諸路監司守臣速決滯訟丙午蠲兩浙路
諸州贓賞錢壬子釋大理三衙及兩浙路杖以下囚丁
巳置嘉定府邊丁二千人以備蠻秋七月甲子朔以左
諫議大夫鄭昭先簽書樞密院事兼權參知政事戊辰
詔省吏毋授參議官乙亥金人來告還于南京庚寅以
起居舍人真德秀奏罷金國歲幣是月夏人以書來四
川議夾攻金人不報八月癸巳朔罷關外四州所增方
田稅乙未罷四川宣制司所補官癸卯復建宗學置博

士論各一人弟子負百人金國復來督歲幣乙巳太白
經天禁州縣沮壞義役戊申詔以安丙為觀文殿學士
知潭州九月壬戌朔日有食之太白晝見乙丑史彌遠
等上高宗中興經武要略戊寅調殿前司兵增戌天長
縣丙戌以久雨釋大理三衙臨安府杖以下囚庚寅釋
兩浙路杖以下囚除茶鹽賞錢冬十月壬辰朔出內帑
錢振臨安府貧民十一月辛丑朔遣聶子述使金賀正
旦刑部侍郎劉鑰等及太學諸生上章言其不可不報

丙戌命浙東監司發常平米振災傷州縣罷四川制置
大使司所開鹽井十二月甲午復罷同安監鑄錢丁巳
金遣使來賀明年正旦是歲黎州蠻畜卜始降

八年春正月辛未命師禹嗣秀王詔侍從兩省臺諫各
舉將材三人己卯遣丁煇賀金主生辰戊子申嚴銷金
鋪翠之禁二月丙午雷孝友罷壬子蠲平江等五郡逋
負米釋其繫囚己未雨土三月辛丑詔大郡歲舉廉吏
二人小郡一人乙亥以旱命諸路州縣禱雨丙子蠲臨

安府茶鹽賞錢釋兩浙諸州繫囚辛巳應賢良方正能
直言極諫科何致坐妄造事端營惑衆聽配廣西牢城
癸未安定郡王伯祝薨丙戌釋江淮闕雨州縣杖以下
囚夏四月乙未幸太一宮明慶寺禱雨辛丑避正殿減
膳壬寅禱雨于天地宗廟社稷癸卯詔中外臣民直言
時政得失乙巳減臨安及諸路雜犯死罪以下囚釋杖
以下五月辛未雨己卯命利州路安撫司招刺忠義人
辛巳御正殿復膳癸未復命有司禱雨甲申詔賊吏毋

得減年參選著為令乙酉發米振糶臨安府貧民六月
丙辰詔兩浙江淮路諭民雜種粟麥麻豆有司毋收其
賦田主毋責其租秋七月辛酉以鄭昭先參知政事禮
部尚書曾從龍簽書樞密院事壬戌詔四川立楊巨源
廟名曰褒忠戊辰蠲兩淮諸州今年秋稅併極邊五州
明年夏稅癸酉蠲臨安紹興二府貧民夏稅丙子發米
三十萬石振糶江東饑民庚辰詔弟搢更名思正姪均
更名貴和甲申詔職田蠲放如民田違者坐之八月己

丑賜張栻謚曰宣庚子申嚴宗子訓名法丁未權罷旱
傷州縣比較賞罰己酉禁州縣遏糴是月蘭州盜程彥
暉求內附四川制置使董居誼却之九月己巳朝獻于
景靈宮庚午朝饗于太廟辛未合祭天地于明堂大赦
乙亥申嚴兩浙園田之禁甲申罷四川法科試冬十月
乙未命六部各類赦書寬恤事下諸路監司推行壬寅
金遣使來賀瑞慶節十一月丙辰朔封伯澤為安定郡
王癸亥遣施累使金賀正旦十二月己丑詔楊巨源李

好義子孫各進一官辛亥金遣使來賀明年正旦是歲
兩浙江東西路旱蝗

九年春正月乙丑賜呂祖謙謚曰成置馬軍司水軍乙
亥遣留筠賀金主生辰丙子命諸州招填軍籍辛巳罷
諸路旱蝗州縣和糴及四川關外科糴二月甲申朔日
有食之辛亥東西兩川地大震三月乙卯又震甲子又
震馬湖夷界山崩八十里江水不通丁卯又震壬申又
震丁丑詔侍從臺諫兩省舉堪監司者各二人夏四月

戊戌秦州人唐進與其徒何進等引衆十萬來歸四川
制置使董居誼拒却之五月癸酉太白晝見六月辛卯
西川地震壬辰又震乙未又震黎州山崩戊申振恤浙
西被水州縣寬其租稅秋七月戊辰詔邊縣擇才不拘
常法其餘並遵三年之制九月甲申詔兩浙江東監司
覈州縣被水最甚者蠲其租冬十月癸亥西川地震甲
子又震丙寅金遣使來賀瑞慶節十一月庚寅遣陳伯
震使金賀正旦癸卯以程彥暉攻圍鞏州迫及川界命

利州副都統劉昌祖移駐西和州以備之十二月丁巳
再給諸軍雪寒錢乙亥金遣使來賀明年正旦

宋史卷三十九

欽定四庫全書

宋史卷四十

元中書右丞相總裁托克托等修

本紀第四十

寧宗四

十年春正月癸巳雨土乙未大風庚子遣錢撫賀金主
生辰二月庚申地震夏四月丁未朔金人犯光州中渡
鎮執權場官盛允升殺之遂分兵犯樊城戊申鄂州江

陵府副都統王守中引兵拒之金人遂分兵圍棗陽光
化軍丙辰詔江淮制置使李珣京湖制置使趙方措置
調遣仍聽便宜行事丁巳命四川制置使董居誼酌量
緩急便宜行事辛酉廬州鈐轄王辛敗金人于光山縣
之安昌砦殺其統軍完顏掩壬戌金兵遁去徐州光化
皆以捷聞丁卯詔出戍官兵金給其家五月辛巳以久
雨釋大理三衛臨安府杖以下囚蠲茶鹽賞錢甲申賜
禮部進士吳潛以下五百二十有三人及第出身癸卯

趙方請下詔伐金遂傳檄招諭中原官吏軍民六月庚戌太白晝見戊午詔厲將士募京西忠義人進討辛未東川大水癸酉太白經天秋七月丙子朔日有食之戊午以旱釋諸路杖以下囚甲申雅州蠻寇邊焚碉門砦遣兵討之丁亥嗣濮王不儔薨庚子詔諸軍將佐有罪者送屯駐州鞠之罷軍士淫刑八月乙丑詔監司郡守各舉威勇材畧可將帥者二人冬十月乙巳朔以久雨釋大理三衙臨安府及兩浙諸州杖以下囚癸酉蠲三

衙江上諸軍公私逋負錢十一月丁丑大風庚辰太白
晝見甲申詔浙東提舉司發米十萬石振給貧民戊戌
太白經天十二月戊申以軍興募民納粟補官乙卯詔
武舉人毋復應文舉癸亥金鳳翔副都統軍完顏贊以
步騎萬人犯四川戊辰迫湫池堡己巳破天水軍守臣
黃炎孫遁金人攻白環堡破之庚午迫黃牛堡統制劉
雄棄大散關遁金人據之

十一年春正月壬午京東路忠義李全率衆來歸詔以

全為京東路總管戊子金人圍皂郊堡壬辰利州將麻
仲率忠義人焚秦州永寧砦乙未以度僧牒千給四川
軍費丁酉詔四川忠義人立功賞視官軍金人犯隔芽
關興元都統李貴遁官軍大潰二月甲辰金人焚大散
關而去乙巳沔州都統王大才馬蹶死于河池丙午金
人破皂郊死者五萬人丁未金人破湫池堡戊申金人
圍隨州棗陽軍游騎至漢上均州守臣應謙之棄城走
丙辰白虹貫日楚州鈐轄梁昭祖焚金人糧舟于大清

河京東忠義副都統沈鐸遣兵助之三月丁丑金人焚
湫池堡而去戊子利州統制王逸等率忠義人復皂郊
金副統軍完顏贊包長壽遁去沔州軍郭雄追斬贊首
長壽僅以身免己丑沔州都統劉昌祖至皂郊辛卯忠
義人十萬餘出攻秦州官軍繼進至赤谷口王逸傳昌
祖之命退師且放散忠義人軍大潰癸巳包長壽合長
安鳳翔之衆復攻皂郊遂趨西和州是日鎮江忠義統
制彭惟誠等敗于泗州丙申劉昌祖焚西和州遁守臣

楊克家棄城去戊戌金人破西和州夏四月甲辰劉昌
祖焚成州遁守臣羅仲甲棄城去是日金人去西和州
戊申命四川增印錢引五百萬以給軍費階州守臣侯
頤棄城去是日金人去成州戊午金人復犯大散關守
將王立遁己未金人犯黃牛堡興元都統吳政拒退之
癸亥政至大散關執王立斬之五月乙亥命四川制置
司招進忠義人癸未蚩尤旗見其長竟天丁亥詔侍從
臺諫兩省官集議平戎禦戎和戎三策壬辰申嚴試法

官七等之制六月辛酉詔湖州振恤被水貧民秋七月
癸酉奪知天水軍黃炎孫三官辰州居住乙酉修孝宗
寶訓辛卯蠲四川關外諸州稅役甲午蠲光州民兵戰
死之家稅役九月己卯朝獻于景靈宮庚辰朝享于大
廟辛巳合祭天地于明堂大赦辛卯安定郡王伯渾薨
丙申興元都統吳政利州副都統張威各進三官劉昌
祖奪五官韶州安置冬十月丙午羅仲甲楊克家侯頤
並奪三官仲甲常德府克家道州頤撫州居住戊午大

風壬戌脩盱眙軍城十一月壬申金人攻安豐軍之黃口灘是月陝西人張羽來歸

十二年春正月戊辰朔召董居誼詣行在以新利州路安撫使聶子述為四川制置使庚辰金人犯湫池堡守將石宣拒退之甲申金人攻白環堡守將董炤拒退之戊子金人犯成州沔州都統張威自西和州退守仙人原庚寅金人犯隨州棗陽軍又破信陽軍之二砦京西諸將引兵拒之辛卯金人犯西和州守將趙彥呐設伏

以待之殲其衆乃還金人犯安豐軍建康都統許俊遣將却之金人焚成州犯河池守將張斌遁去癸巳金人圍安豐軍及光州攻光化軍破鄖山縣進逼均州甲午破鳳州守臣雷雲棄城去金人夷其城乙未興元都統吳政及金人戰于黃牛堡死之金人乘勝攻武休關二月戊戌朔金人破光山縣太白晝見壬寅金人圍棗陽軍京湖制置使趙方遣統制扈再興救之不克進而還癸卯金人破武休關興元都統李貴遁還利州路提刑

權興元府事趙希皆棄城去丁未金人破興元府戊申
金人攻棗陽軍已酉遣殿前司軍八千人防捍江面庚
戌以曾從龍同知樞密院事無江淮宣撫使權吏部尚
書任希夷簽書樞密院事辛亥金人破大安軍守臣李
文子棄城去金人犯洋州守臣蔡晉卿遣兵拒之不克
洋州破壬子四川制置使董居誼自利州遁沔州都統
張威遣統制石宣等邀擊金人于大安軍大破之獲其
將巴土魯安金人遂去興元府丙辰金人去洋州丁巳

京湖制置使趙方遣統制扈再興等引兵三萬餘人出
攻唐鄧二州隨州忠義統領劉世興等引兵攻唐州甲
子金人去棗陽軍乙丑夏人復以書來四川議夾攻金
人利州路安撫丁焞許之三月己巳以鄭昭先知樞密
院事曾從龍參知政事癸酉金人復入洋州焚其城而
去乙亥興元軍士權興等作亂犯巴州守臣秦季樞棄
城去鄂州統制劉世榮會兵攻唐州丁亥太白晝見權
興等降癸巳雨土甲午金人自盱眙退師閏月己未追

雷雲三官梅州安置卒酉贈吳政為右武大夫忠州刺史壬戌詔撫諭四川官軍忠義人癸亥興元軍士張福莫簡等作亂以紅巾為號是春金人圍安豐軍滁濠光三州江淮制置使李珣命池州都統武師道忠義軍統制陳孝忠救之皆不克進金人遂分兵自光州犯黃州之麻城自濠州犯和州之石碛自盱眙軍犯滁州之全椒來安及楊州之天長真州之六合淮南流民渡江避亂諸城悉閉金人游騎數百至東采石楊林渡建康大

震京東總管李全自楚州忠義總轄李先自漣水軍各
引兵來援金人乃解去全追擊敗之于曹家莊獲其貴
將夏四月庚午張福入利州四川制置使聶子述遁殺
總領財賦楊九鼎丁丑張福掠閬州丁亥掠果州癸巳
曾從龍罷以鄭昭先兼參知政事崇信軍節度使開府
儀同三司萬壽觀使安丙為四川宣撫使董居誼落職
奪三官五月乙未朔召聶子述詣行在張福薄遂寧府
潼川府路轉運判官權府事程遇孫棄城遁丁酉減兩

淮荆襄湖北利州路沿邊諸州雜犯死罪囚釋流以下
仍蠲今年租稅己亥太學生何處恬等伏闕上書以工
部尚書胡榘欲和金人請誅之以謝天下張福入遂寧
府焚其城甲寅四川宣撫司命沔州都統張威引兵捕
福戊午福入晉州守臣張已之棄城遁癸亥詔侍從兩
省臺諫各舉文武可用之才二三人六月戊辰張福屯
普州之茗山庚午張威引兵至丙子太白晝見辛巳西
川地震太白晝見癸未張福請降乙酉張威執之歸于

宣撫司丁亥嗣濮王不嫖薨金國招諭李全等不聽卒
卯太白經天癸巳丁焞復以書約夏國攻金人秋七月
丙申張福伏誅復奪董居誼二官永州居住庚子張威
捕賊衆一千三百餘人誅之莫簡自殺紅巾賊悉平癸
亥李全引兵至齊州知州王贊以城降八月戊辰復合
利州東西路為一九月丙午罷江淮制置司置沿江淮
東西制置司以寶文閣待制李大東為沿江制置使淮
南轉運判官趙善湘為主管淮西制置司公事淮東提

刑賈涉為主管淮東制置司公事兼節制京東河北路
軍馬十一月辛亥進封楊次山為會稽郡王十二月壬
申京東節制司言復京東河北二府九州四十縣乙亥
築興元府城丁丑雅州蠻入盧山縣己卯四川宣撫司
遣兵取洮州召諸將議出師招諭中原豪傑辛巳蠻焚
碣門砦邊丁大敗乙酉金人犯鳳州之長橋丁亥四川
宣撫司命罷洮州之師己丑京湖制置司遣統制扈再
興等引兵六萬人分二道出境庚寅賞茗山捕賊功

十三年春正月丁酉扈再興引兵攻鄧州鄂州都統許國攻唐州不克而還金人追之遂攻樊城趙方督諸將拒退之己亥雅州蠻復掠廬山縣遣兵討之己酉命不凌為嗣濮王戊午夏人復以書來四川議夾攻金人三月辛卯朔雨土丁巳黎州土丁叛遣兵討之夏四月庚申朔淮東制置賈涉招諭山東兩河豪傑五月庚寅朔雅州蠻降戊戌史彌遠等上玉牒及三祖下第七世宗藩慶系錄六月癸酉賜禮部進士劉渭以下四百七十

有五人及第出身加安丙少保丙子以李全為左武衛大將軍壬午以季先為果州團練使漣水軍忠義副都統命赴樞密院議事未至殺之秋七月戊戌以京東河北諸州守臣空名官告付京東河北節制司以待豪傑之來歸者丙午以任希夷兼參知政事丙辰四川宣撫司招黎人土丁降之八月癸亥皇太子詢薨謚曰景獻壬申安丙遺夏人書定議夾攻金人癸未四川宣撫司命利州統制王仕信引兵赴熙鞏州會夏人遂傳檄招

論陝西五路官吏軍民甲申復海州以將作監丞徐晞
稷知州事盱眙將石珪叛入漣水軍詔以珪為漣水忠
義軍統轄九月辛卯夏人引兵圍鞏州且來趣師甲午
太白晝見王仕信引兵發宕昌乙未四川宣撫司統制
質俊李寔引兵發下城戍戊戌四川宣撫司命諸將分道
進兵沔州都統張威出天水利州副都統程信出長道
興元副都統陳立出大散關興元統制田胃為宣撫司
帳前都統出子午谷金州副都統陳昱出上津己亥張

威下令所部諸將毋得擅進兵庚子質俊等克來遠鎮
辛丑王仕信克鹽川鎮壬寅質俊等自來遠鎮進攻定
邊城金人來救俊等擊破之乙巳程信王仕信引兵與
夏人會于鞏州城下丁未攻城不克庚戌金人犯皂郊
堡沔州統制董炤等與戰大敗壬子程信及夏人攻鞏
州不克信引兵趨秦州丙辰夏人自安遠砦退師冬十
月丁巳朔程信邀夏人共攻秦州夏人不從信遂自伏
羗城引軍還諸將皆罷兵戊寅程信以四川宣撫司之

命斬王仕信于西和州四川宣撫司以張威不進兵罷其軍職十一月庚戌大風壬子臨安府火十二月戊午大風壬申漣水忠義軍統轄石珪叛癸未鎮江副都統翟朝宗以皇帝恭膺天命之寶來獻

十四年春正月丙戌朔以雪寒釋大理三衙臨安兩浙諸州杖以下囚乙未地震以李全還自山東賜緡錢六萬庚子立四川運米賞格二月戊辰金人圍光州己巳金人犯五關壬申金人治舟于團風弗克濟遂圍黃州

分兵破諸縣又遣別將犯漢陽軍丁丑李全棄泗州遁
還甲申詔淮東京湖諸路應援淮西沿江制置司防守
江面權殿前司職事馮榑將兵駐鄂州京東忠義都統
李全將兵救蘄黃榑不果行三月丙戌朔鄂州副都統
扈再興引兵攻唐州丁亥金人破黃州淮西提刑知州
事何大節棄城遁死庚寅長星見李全自楚州引兵援
淮西癸巳扈再興引所部趨蘄州甲午太白晝見乙未
詔京湖制置司趣援蘄黃己亥金人陷蘄州知州事李

誠之及其家人官屬皆死之癸丑金人退師扈再興邀
擊敗之于天長鎮甲寅晦又敗之夏四月乙卯復置諸
王宮大小學教授乙丑命任子簾試于御史臺戊辰金
人渡淮而北李金遣兵追擊敗之五月甲申朔日有食
之壬辰史彌遠等上孝宗寶訓皇帝會要丙申西川地
震乙巳頒慶元寬恤詔令六月甲寅朔初置沿江制置
副使司于鄂州丙寅詔以姪福州觀察使貴和為皇子
更名竑進封祁國公丁卯以立皇子告于天地宗廟社

稷乙亥以太祖十世孫與莒補乘義郎丙子減京畿囚
罪一等釋杖以下辛巳大風秋七月辛丑以趙方為京
湖制置大使賈涉為淮東制置使兼京東河北路節制
使丁未修光宗寶訓八月乙卯賜史彌遠家廟任希夷
罷壬戌以兵部尚書宣繒同知樞密院事給事中俞應
符簽書樞密院事甲子以秉義郎與莒為右監門衛大
將軍賜名貴誠乙丑追封史浩為越王改諡忠定配享
孝宗廟庭戊寅以姪右監門衛大將軍貴誠為果州團

練使九月癸未立貴誠為沂靖惠王後己丑朝獻于景
靈宮庚寅朝饗于太廟辛卯合祭天地于明堂大赦冬
十月癸丑京東河北節制司言復滄州詔以趙澤為河
北東路鈐轄知州事甲寅復以齊州為濟南府兗州為
襲慶府丙寅夏人復以書來四川趣會兵庚午雷十一
月己亥安丙薨是月京東安撫張林叛十二月庚申鄭
昭先罷閏月辛巳朔以宣繒兼參知政事俞應符兼權
參知政事戊申以殿前司同正將華岳等謀為變殺之

是歲浙東江西福建諸路旱沔成階利四州水振之

十五年春正月庚戌朔御大慶殿受恭膺天命之寶癸丑立李誠之廟于蘄州甲寅褒贈蘄州死事官吏錄其子孫有差丁巳詔撫諭山東河北軍民將帥官吏已未以受寶大赦文武官各進秩一級大犒諸軍二月庚子罷御史臺簾試任子法三月丁巳詔江西提舉司振恤旱傷州縣夏四月壬午詔蠲蘄州今年租賦五月庚戌太白晝見甲寅詔監司慮囚察州縣匿囚者劾之丁巳

進封子祁國公竑為濟國公己未以姪果州團練使貴
誠為郃州防禦使壬戌知濟南府種贇等攻張林子青
州林遁去己巳脩孝宗經武要略六月辛卯俞應符薨
秋七月甲子詔江淮荆襄四川制置監司條畫營田來
上八月己卯命戶部詳議義役辛卯詔文武官毋得歸
宗著為令甲午有彗星出于氐九月辛亥以宣繒參知
政事給事中程卓同知樞密院事吏部尚書薛極賜出
身簽書樞密院事癸丑雷大雨雹丁巳復以隨州三關

隸德安府置關使壬戌彗星没辛未太白晝見冬十月
丙子以收復京東州軍犒賞忠義有差十一月戊午赦
京東河北路十二月乙亥朔發米振給臨安府貧民丙
子以雪寒釋京畿及兩浙諸州杖以下囚丁亥以李全
為保寧軍節度使右金吾衛上將軍京東路鎮撫副使
十六年春正月戊申詔命官犯賊毋免約法己酉子坻
生辛酉命淮東制置司振給山東流民二月戊子雨土
己丑嗣秀王師禹薨追封和王戊戌子坻薨追封邵王

謚冲美三月戊申張林所部邢德來歸詔進二官復以
為京東東路副總管丁卯以道州民饑詔發米振之夏
五月甲辰詔右選試注官如左選之制戊申賜禮部進
士蔣重珍以下五百四十有九人及第出身戊辰詔復
潭州稅酒法六月丁酉程卓薨秋八月辛巳詔州縣經
界毋增紹興稅額癸未申嚴船舶銅錢之禁九月庚子
朔日有食之乙巳詔江淮諸司振恤被水貧民乙卯雷
冬十一月辛亥以太平州大水詔振恤之十二月辛巳

命淮東西總領及沿江被水州募江西湖南民入米補
官癸未嗣濮王不凌薨壬辰雷

十七年春正月戊戌朔詔補先聖裔孔元用為通直郎
錄程頤後癸亥命淮東西湖北路轉運司提督營屯田
二月癸巳蠲台州通賦十萬餘緡甲午命臨安府振糶
貧民三月癸丑雪是月金人迫西和州尋引兵還夏四
月辛卯詔廬州振糶饑民乙未賜李全彭義斌錢三十
萬緡為犒賞戰士費五月戊戌詔覈實兩淮京湖四川

江上諸軍之數六月丁卯朔太白經天晝見癸酉知和
州尚震午坐金兵至謀遁奪三官岳州居住壬辰大名
府蘇椿等舉城來歸詔悉補官即以其州授之秋七月
丁酉朔命福建路監司振恤被水貧民辛亥命師崑嗣
秀王八月乙亥罷通州天賜鹽場丙戌帝不豫閏八月
乙未朔申嚴兩浙諸州輸苗過取之禁丁酉皇帝崩于
福寧殿年五十七史彌遠傳遺詔立姪貴誠為皇子更
名昀即皇帝位尊皇后為皇太后垂簾聽政進封皇子

竑為濟陽郡王出居湖州寶慶元年正月乙丑謚曰仁
文哲武恭孝皇帝廟號寧宗三月癸酉葬于會稽之永
茂陵三年九月加諡法天備道純德茂功仁文哲武聖
睿恭孝皇帝

贊曰宋世內禪者四寧宗之禪獨當事勢之難能不失
禮節焉斯可謂善處矣初年以舊學輔導之功召用宿
儒引拔善類一時守文繼體之政熒然可觀中更侂冑
用事內蓄羣姦至指正人為邪正學為偽外挑強鄰流

毒淮甸頻歲兵敗乃函侂冑之首行成于金國體虧矣
既而彌遠擅權幸帝耄荒竊弄威福至於皇儲國統乘
機伺間亦得遂其廢立之私他可知也雖然宋東都至
于仁宗四傳而享國百年邵雍稱為前代所無南渡至
寧宗亦四傳而享國九十有八年是亦豈偶然哉惜乎
神器授受之際寧理之視仁英其跡雖同其情相去遠
矣

宋史卷四十

欽定四庫全書

宋史卷四十一

元中書右丞相總裁托克托等修

本紀第四十一

理宗一

理宗建道備德大功復興烈文仁武聖明安孝皇帝諱
昀太祖十世孫父希廬追封榮王家于紹興府山陰縣
母全氏以開禧元年正月癸亥生于邑中虹橋里第前

一夕榮王夢一紫衣金帽人來謁比寤夜漏未盡十刻
室中五采爛然赤光屬天如日正中既誕三日家人聞
戶外車馬聲亟出無所睹幼嘗晝寢人忽見身隱隱如
龍鱗是時寧宗弟沂靖惠王薨無嗣以宗室希瞿子賜
名均為沂王後尋改賜名貴和嘉定十三年八月景獻
太子薨寧宗以國本未立選太祖十世孫年十五以上
者教育如高宗擇普安恩平故事遂以十四年六月丙
寅立貴和為皇子改賜名竑而以帝嗣沂王六月乙亥

補秉義郎八月甲子授右監門衛大將軍賜名貴誠十
五年五月丁巳以竝為檢校少保進封濟國公己未以
帝為邵州防禦使帝性疑重寡言潔修好學每朝參待
漏或多笑語帝獨儼然出入殿庭矩度有常見者斂容
會濟國公竝與丞相史彌遠有違言彌遠日謀媒孽其
失於寧宗屬意於帝而未遂十七年八月丙戌寧宗違
豫自是不視朝壬辰疾篤彌遠稱詔以貴誠為皇子改
賜名昀授武泰軍節度使封成國公閏月丙申寧宗疾

甚丁酉崩于福寧殿彌遠使楊谷楊石入自楊皇后稱
遺旨以皇子竑開府儀同三司進封濟陽郡王判寧國
府命子昀嗣皇帝位大赦尊楊皇后曰皇太后同聽政
封竑為濟王賜第湖州以醴泉觀使就第癸亥詔宮中
自服三年喪九月乙亥詔褒表老儒以傅伯成為顯謨
閣學士楊簡寶謨閣直學士並提舉南京鴻慶宮柴中
行敘復元職授右文殿脩撰主管南京鴻慶宮戊寅詔
兄濟王妻衛國夫人吳氏封許國夫人己卯皇太后皇

帝御便殿垂簾詔以先聖四十九代孫行可為迪功郎授判司簿尉以禮部侍郎程秘吏部侍郎朱著中書舍人真德秀兼侍讀工部侍郎葛洪起居郎喬行簡宗正少卿陳貴誼軍器監王堅兼侍講壬午葛洪權工部尚書升兼侍讀辛卯祀明堂大赦冬十月戊戌詔諸路提點刑獄以十一月按理囚徒己亥嗣秀王師岳薨壬子詔百官奉按月給十一月甲子右正言麋漂請承順東朝繼志述事壹以孝宗為法而新政之切者曰畏天悅

親講學仁民上嘉納焉癸未以五月十六日為皇太后
壽慶節丁亥詔改明年為寶慶元年戊子以葛洪為端
明殿學士同簽書樞院事己丑詔以生日為天基節十
二月甲午雪寒免京城官私房賃地門稅等錢自是祥
慶災異寒暑皆免癸丑開經筵詔輔臣觀講詔太后所
居殿號曰慈明辛酉請大行皇帝諡號于南郊諡曰仁
文哲武恭孝皇帝廟號曰寧宗

寶慶元年春正月壬戌朔詔舉賢良庚午湖州盜潘壬

潘丙潘甫謀立濟王竑竑聞變匿水竇中盜得之擁至
州治以黃袍加其身守臣謝周卿率官屬入賀初壬等
僞稱李全以精兵二十萬助討史彌遠擅廢立之罪比
明視之皆太湖漁人及巡尉兵卒竑乃遣王元春告于
朝而率州兵誅賊彌遠奏遣殿司將彭任討之至則盜
平又遣其客秦天錫托宣醫治竑疾諭旨逼竑死尋詔
貶為巴陵郡公辛未詔保寧軍節度使師彌為檢校少
保詔以皇太后弟奉國軍節度使楊谷保寧節度楊石

並開府儀同三司丙戌濟王竑訃聞特輟視朝己丑上
寧宗諡冊寶二月甲午詔故太師武勝定國軍節度使
鄂王岳飛諡忠武丙申詔師彌檢校少師嗣秀王丙辰
楚州火戊午發廩振在京細民給犒馬步軍皇城司守
衛軍有差三月癸酉葬寧宗于會稽永茂陵夏四月辛
卯朔寧宗祔廟壬辰詔皇兄竑贈少師保靜鎮潼軍節
度使直舍人院王堅等繳奏命遂寢丁酉皇太后手書
多病自今免垂簾聽政壬寅帝兩請皇太后垂簾不允

辛亥發廩振在京細民五月甲子詔内外文武大小之
臣於國政有所見聞封章來上毋或有隱丙寅詔不熄
為保康軍承宣使嗣濮王六月辛卯太白晝見丁未詔
史彌遠為太師依前右丞相兼樞密使進封魏國公彌
遠辭免太師秋七月丁丑滁州大水詔振恤之乙酉詔
行大宋元寶錢八月壬寅以司農丞姚子才封事切直
詔進一秩授祕書郎癸卯詔知袁州趙鉉夫直祕閣福
建提點刑獄以旌廉吏丙午詔侍從給諫卿監郎官并

在外前執政侍從師臣監司各舉廉吏三人戊申詔侍從兩省臺諫三衙知閣御帶環衛宮在外前執政侍從帥臣監司都副都統制及屯戍主將其各舉堪充將帥三人己酉地震壬子張九成贈太師追封崇國公謚文忠甲寅以程頤四世孫源為籍田令乙卯莫澤言真德秀舛論綱常簡節上語曲為濟王地詔德秀煥章閣待制提舉玉隆萬壽宮丁巳詔戒貪吏九月丙寅著作佐郎陶崇上保業慎獨謹微持久四事帝嘉納之冬十一

月癸巳有流星大如太白甲寅詔會稽攢宮所在稅賦
盡免折科山陰縣權免三年十一月癸亥宣繪兼同知
樞密院事薛極參知政事葛洪簽書樞密院事詔邵州
潛藩可升為寶慶府筠州與御名音相近改為瑞州壬
午雪寒在京諸軍給緡錢有差出戍之家倍之自是祥
慶災異靈雨雪寒咸給甲申朱端常言魏了翁封章謗
訕真德秀奏劄誣詆詔魏了翁落職奪三秩靖州居住
真德秀落職罷祠十二月甲辰詔刪脩敕今是歲兩浙

路戶一百九十七萬五千九百九十六口二百八十二萬二千三十二福建路戶一百七十萬四千一百八十六口二百五十五萬三千七十九

二年春正月癸亥詔贈沈煥陸九齡官煥謚端憲九齡謚文達錄張九成呂祖謙張拭陸九淵子孫官各有差
癸酉召布衣李心傳赴闕戊寅熒惑入氐壬午太白歲星填星合于女二月辛卯監察御史梁成大言真德秀有大惡五僅褫職罷祠罰輕詔削二秩三月癸酉以久

雨詔大理寺三衙兩浙運司臨安府諸屬縣榷酒所凡
贓賞等錢罪已決者一切勿徵毋錮留妻子自是霖潦
寒暑皆免戊寅詔太常寺建功臣閣以昭勲崇德為名
己卯蘄州火夏四月己丑詔輔臣奉薄其以隆興格為
制辛亥有流星大如太白六月丙申御後殿賜進士王
會龍以下九百八十九人及第出身有差壬寅詔以孔
子五十二代孫萬春襲封衍聖公秋七月戊辰雷電雨
晝晦大風遂安休寧兩縣界山裂洪水壞公宇民居田

疇八月乙巳濟王竑追降巴陵縣公辛亥衛涇薨九月
庚申雷冬十月甲申詔寧宗御集閣以寶章為名仍置
學士待制員辛丑又雷辛亥熒惑歲星填星合于女熒
惑犯填星改湖州為安吉州十一月甲寅脩祚德廟以
嚴程嬰公孫杵臼之祀丙辰始御紫宸殿辛酉熒惑犯
歲星丙子日南至上詣慈明殿十二月癸卯親享太廟
三年春正月辛亥朔上壽明皇太后尊號冊寶于慈明
殿壬子史彌遠追二秩辛酉以楊谷楊石並為少傅知

楚州姚翀朝辭奏淮楚忠義軍事上曰南北皆吾赤子
何分彼此卿其為朕撫定之已已詔朕觀朱熹集註大
學論語孟子中庸發揮聖賢蘊奧有補治道朕勵志講
學緬懷典刑可特贈熹太師追封信國公三月庚戌朔
詔郡縣長吏勸農桑抑末作戒苛擾工部侍郎朱在進
對奏人主學問之要上曰先卿中庸序言之甚詳朕讀
之不釋手恨不與同時辛亥以皇太后尊號冊寶禮成
姪孫楊鳳孫以下推恩有差夏四月戊戌宣引前丞相

謝深甫孫女謝氏詣慈明殿進見五月壬子詔岳珂戶部侍郎依前准東總領兼制置使閏月己卯朔詔郡縣繫囚于實書歷未經給錄守臣輒行特判憲司其詳覆所部獄案歲月淹延者重寘于憲六月戊申朔日有食之秋七月乙酉太陰犯心丁酉詔振贍被水郡縣其竹木等稅勿復丙午史彌遠乞歸田里詔不允八月庚戌詔謝氏特封通義郡夫人癸亥詔凡試邑兩經罷黜更勿授知縣縣令甲戌太白熒惑合于翼丙子城太平州

詔知州綦奎進中奉大夫餘推恩有差九月癸未故觀
文殿大學士魏國公贈太師留正諡忠宣丙午追上寧
宗徽號曰法天備道純德茂功仁文哲武聖睿恭孝皇
帝冬十月甲子右監門衛大將軍與爽改賜名貴謙授
宜州觀察使繼沂王後右千牛衛將軍孟杓改賜名乃
裕授荊州防禦使繼景獻太子後甲戌趙范江東提刑
兼知池州節制防江水步軍池州都統司軍馬十一月
戊寅奉上寧宗徽號冊寶于太廟辛巳日南至郊大赦

改明年為紹定元年十二月己酉日旁有氣如珥壬申
發廩振贍京城細民大元兵破關外諸隘四川制置鄭
損棄三關

紹定元年春正月丙子朔上壽明慈睿皇太后尊號冊
寶于慈明殿楊谷楊石並升少師六月壬寅朔日有食
之己酉流星晝隕秋七月戊戌熒惑犯南斗冬十月戊
申熒惑犯壁壘陣星丁巳熒惑填星合于危甲子熒惑
犯填星十一月癸酉熒惑入羽林庚辰雷丁酉詔申嚴

皇城司給符之制照開入法十二月辛亥以薛極知樞密院事兼參知政事葛洪參知政事袁詔同知樞密院事鄭清之端明殿學士簽書樞密院事

二年春正月庚辰大理司直張衍上檢驗推鞠四事詔刑獄人命所關其令有司究行之丁亥熒惑歲星合于婁二月庚戌詔歲舉廉吏或犯姦贓保任同坐監司守臣其申嚴覺察三月辛卯詔郡縣繫囚多瘐死獄中憲司其具獄官姓名以聞黜罷之夏四月庚申詔郡縣官

關母令藝術人豪民罷吏借補權攝五月詔成都潼川
路歲旱民歉制司監司其亟振恤仍察郡縣奉令勤惰
以聞辛巳賜進士黃朴以下五百五十七人及第出身
有差詔絕戶者許立嗣母妄籍沒六月丁巳詔通義郡
夫人謝氏進封美人九月丁卯台州大水壬辰有流星
大如太白冬十月壬戌詔台州水災除民田租及茶鹽
酒酤諸雜稅郡縣抑納者監司察之十一月己丑癸感
入氏

三年春正月甲申詔故皇子緝贈保信奉國軍節度使
開府儀同三司追封永王諡冲安壬辰知棗陽軍史嵩
之劾置屯田以勞賞官兩轉二月丙申日有背氣戊戌
詔汀贛吉建昌蠻獠竊發經擾郡縣復賦稅一年庚戌
詔趙范起復依前知鎮江府節制防江水步并本州在
砦軍馬趙葵起復依前知滁州節制本州屯戍軍馬壬
子詔故皇子繹賜忠正保寧軍節度使開府儀同三司
追封昭王諡冲純閏月癸酉逃卒穆椿夜竊入皇城燒

毀甲仗衛士捕得之詔磔于市乙酉太白歲星合于畢
三月丁酉雨土戊申奉國軍節度使不恠薨贈少傅追
封樂平郡王夏四月己卯漳州連城盜起知龍巖縣莊
夢詵尉鍾自強不能效死守土詔各削二秩罷五月甲
寅檢校少保李全授彰化保康軍節度使開府儀同三
司京東鎮撫使依舊舊京東忠義諸軍都統制戊午李
全左右金吾衛上將軍職任仍舊六月乙酉歲星入井
秋七月丁酉汀州寧化縣曾氏寡婦晏給軍糧禦漳寇

有功又全活鄉民數萬人詔封恭人賜冠帔官其子承
信郎九月辛丑祀明堂大赦丙午美人謝氏進封貴妃
冬十月己巳熒惑填星合于室十一月丁酉有星孛于
天市垣丁未流星晝隕十二月庚申詔錄用孔子四十
九代孫燦補官李全叛壬戌淮東官兵王青力戰死之
贈右武大夫蘄州防禦使甲子詔逆賊李全反形日著
今乃肆為不道已敕江淮制臣率兵進討有能擒斬全
以降者加以不次之賞乙丑詔免明年元會禮以鄭清

之參知政事兼簽書樞密院事喬行簡端明殿學士同
簽書樞密院事詔史彌遠敷奏精敏氣體向安朕未欲
勞以朝謁可十日一起都堂治事丁卯冊命貴妃謝氏
為皇后己卯慈明殿出緡錢百五十萬犒諸軍振贍在
京細民癸未上壽明仁福慈睿皇太后尊號冊寶

四年春正月戊子皇太后年七十有五上詣慈明殿在
慶壽禮大赦史彌遠以下進秩有差賜李心傳同進士
出身壬寅趙范趙葵等誅李全於新塘詔各進兩秩餘

推恩有差二月戊午朔詔雄邊軍統制總轄范勝谷汝礪等誅逆著勞各官五轉將士立功者趣具等第姓名
來上丙子詔起復孟珙從義郎京西路分棗陽軍駐劄
夏四月戊辰趙范趙葵並進中大夫右文殿脩撰賜紫
章服金帶丁丑以鄭清之兼同知樞密院事喬行簡簽
書樞密院事趙善湘兵部尚書江淮制置大使知建康
府依舊安撫使趙范權兵部侍郎淮東安撫副使知楊
州兼江淮制司參謀官趙葵換福州觀察使右驍騎衛

大將軍淮東提刑知滁州兼大使司參議官五月丙午
宗室司正檢校少傅安德軍節度使天水郡公加食邑
五百戶貴謙承宣使乃裕觀察使六月己未詔魏了翁
真德秀尤燭尤燾並叙復元官職祠祿七月己丑日生
承氣丁酉賈涉女侍後宮詔封文安郡夫人庚戌葛洪
資政殿學士知紹興府有流星大如太白八月己未大
元兵破武休入興元攻仙人關辛酉洪咨夔叙復元官
祠祿辛未文安郡夫人賈氏封才人九月丙戌夜臨安

火延及太廟統制徐儀統領馬振遠坐救焚不力貶削
有差上素服眊朝減膳徹樂庚子建昌軍火甲辰流星
晝隕冬十月戊午太常少卿度正國史院編脩官李心
傳各疏言宗廟之制未合於古茲緣災異宜舉行之詔
兩省侍從臺諫集議以聞甲子以余天錫為戶部侍郎
兼知臨安府浙西安撫使癸酉大元兵破蜀口諸郡御
前中軍統制張宣戰青野原有功詔授沔州都統戊寅
以李璣為煥章閣直學士四川制置使知成都府趙彥

叻直龍圖閣四川安撫制置副使知興元府利路安撫
使安癸仲戶部郎中總領四川財賦十一月乙酉詔忠
義總管田遂力戰而歿贈武節大夫忠州刺史加封立
廟十二月乙亥以史嵩之為大理少卿燕京湖制置副
使

五年春正月己丑以孟珙為京西路兵馬鈐轄棗陽軍
駐劄庚寅詔李全之叛淮東提刑司檢法吳澄等出泰
州城謁賊各追官勒停其不出見賊者高夢月劉賓雲

循升二資罵賊而死者海陵簿吳嘉特贈朝奉郎官其一子將仕郎壬辰史嵩之進大理卿權刑部侍郎京湖安撫制置使知襄陽府壬寅新作太廟成二月癸丑帝謁太廟三月乙酉詔京城內外免征商三月丁酉日生抱氣承氣夏四月癸亥以寶章閣直學士桂如淵領帥蜀日北兵攻城不能謀合死守而迫致軍民罹殃反以捷聞詔褫職罷祠丁卯起魏了翁以集英殿脩撰知遂寧府五月己丑詔昨鬱攸為災延及太室罪在朕躬而

二三執政引咎去職今宗廟崇成神御安安薛極鄭清之喬行簡並復元官辛卯臣僚言積陰霖霖歷夏徂秋疑必有致咎之徵比聞蘄州進士馮杰本儒家都大坑冶司抑為鑪戶誅求日增杰妻以憂死其女繼之弟大聲因赴愬死于道路杰知不免毒其二子一妾舉火自經而死民冤至此豈不上干陰陽之和詔都大坑冶魏峴罷職癸巳太白經天晝見戊戌詔今後齊民有罪監司守臣毋輒籍沒其家必具聞俟命六月乙丑癸惑填

星合于婁熒惑順行犯填星丙子詔諸獄官不理他務
秋七月甲申詔近歲北兵再入利閬迫近順慶承奉郎
胡元琰攝郡事能收散卒定居民諭叛將以全閬郡以
功特轉官三資太白入井丙戌監楚州大軍倉富起宗
軍變死難詔贈宣教郎官一子文林郎張煥同時被創
害及其家詔轉官一資丁酉以吳潛為太府少卿總領
淮西財賦陳貴誼端明殿學士同簽書樞密院事八月
乙卯起真德秀為徽猷閣待制知泉州丁巳泗州路分

劉虎副都統董琳焚斷盱泗橋遏金兵己未魏了翁以
寶章閣待制潼川安撫使知瀘州乙丑賜進士徐元杰
等四百九十三人及第出身有差壬申太白歲星合于
張甲戌新作玉牒殿奉安累朝玉牒九月乙巳雨雹雷
閏月己酉有流星大如太白庚戌彗星出于角戊辰史
彌遠乞歸田里詔不允冬十月戊子以星變大赦金將
以盱眙軍來降赦盱眙改為招信軍十一月己巳喬行
簡累疏乞歸田詔不允十二月丙子朔進封才人賈氏

為貴妃辛巳皇太后不豫壬午大赦皇太后崩癸卯羣臣凡七表請聽政從之詔外朝大典不敢輕改宮中自服三年喪時宋與大元兵合圍汴京金主奔歸德府尋奔蔡州大元再遣使議攻金史嵩之以鄒伸之報謝

六年春正月己酉以少傅保寧軍節度使嗣秀王師彌判大宗正事趙善湘光祿大夫江淮制置大使兼知建康府行宮留守加食邑四百戶戊辰史彌遠加食邑千戶二月丁丑上大行皇太后諡曰恭聖仁烈皇后以趙

范為工部侍郎兼中書門下省檢正公事趙葵祕書監
兼侍講余天錫禮部侍郎兼侍讀癸卯熒惑犯東井三
月丙辰大雨雹夏四月壬寅葬恭聖仁烈皇后于永茂
陵五月庚戌太白熒惑合于柳鄧州移刺以城來降六
月丁酉史嵩之刑部侍郎兼京湖安撫制置使兼知襄
陽府秋七月敗武仙于浙江八月拔唐州九月壬寅朔
日有食之辛亥祀明堂大赦辛酉經筵官請以御製敬
天法祖事親齊家四十八條及緝熙殿榜殿記宣付史

館冬十月江海領襄軍從大元兵合圍金主於蔡州甲
申史宅之太府少卿史宇之將作少監並賜同進士出
身丙戌史彌遠進太師左丞相兼樞密使魯國公加食
邑一千戶鄭清之光祿大夫右丞相兼樞密使加食邑
一千戶丁亥史彌遠保寧昭信軍節度使充醴泉觀使
進封會稽郡王仍奉朝請加食邑封以薛極為樞密使
喬行簡參知政事兼同知樞密院事陳貴誼參知政事
兼簽書樞密院事詔史彌遠有定策大功勤勞王室今

以疾解政宜加優禮長子宅之權戶部侍郎兼崇政殿
說書次子宇之直華文閣樞密院副都承旨長孫同

直寶章閣次孫紹卿良卿會卿晉卿並承事郎女夫趙
汝祺軍器少監孫女夫趙崇梓官一轉己丑詔崔與之
李璽鄭性之赴闕庚寅以顯謨閣待制知福州真德秀
兼福建安撫使乙未史彌遠薨贈中書令追封衛王諡
忠獻詔戒貪吏十一月乙巳給事中莫澤等言差提舉
千秋鴻禧觀梁成大暴狠貪婪苟賤無恥詔奪成大祠

祿丙午詔改明年為端平元年己未以魏了翁為華文閣待制知瀘州潼川安撫使賜金帶癸亥進趙葵兵部侍郎淮東制置使兼知楊州甲子臺臣劾刑部尚書莫澤貪淫忤害罷之丙寅權二部尚書趙范言宣和海上海之盟厥初甚美迄以取禍其事不可不鑑帝嘉納之丁卯詔趙葵任責防禦戊辰禮部郎中洪咨夔進對今日急務進君子退小人如真德秀魏了翁當聚之于朝帝是其言命咨夔洎王遂同為監察御史己巳趙葵入見

帝問以金事對曰今國家兵力未贍姑從和議俟根本既壯雪二帝之恥以復中原十二月戊寅史宅之繳納賜第詔給賜本家仍奉家廟庚辰以許極為觀文殿大學士知紹興府兼浙東安撫使甲申吳潛太府卿仍淮西總領財賦暫兼沿江制置知建康府戊申洪咨夔言資政殿學士提舉洞霄宮袁韶仇視善類謫附彌遠險伎傾危詔袁韶奪職罷祠祿壬辰臺臣言趙善湘陳賅鄭損納賂彌遠怙勢肆姦失江淮荆襄蜀漢人心罪狀

顯著詔趙善湘有討李全功特寢免陳賅與祠鄭損落
職與祠

端平元年春正月庚子朔詔求直言侍從卿監郎官在
外執政從官舉堪為監司守令者各二人三衙統帥知
閣御帶環衛官在外總管軍帥舉堪為將帥者各二人
鍾震陳公益李性傳張處並兼侍讀徐清叟黃朴李大
同葉味道並兼崇政殿說書辛丑趙范依前沿江制置
副使權移司知黃州史嵩之權京湖安撫制置使兼知

襄陽府陳華文閣待制仍知隆興府江西安撫使詔
德安三關使彭哲去年十月北兵至棄關遁削二秩勒
停乙巳賜故少傅權參知政事任希夷諡宣憲丙午詔
趙范兼淮西制置副使任責防禦太白熒惑合在斗戊
申金主完顏守緒傳位于宗室承麟己酉城破守緒自
經死承麟為亂兵所殺執其參知政事張天綱丙寅詔
太師中書令榮王已進王爵宜封三代曾祖子奭贈太
師吳國公祖伯盱贈太師益國公父師意贈太師越國

公戊辰以樞密院言詔京西忠順統制江海棗陽同統制郭勝向因所部兵行劫坐不發覺除名廣州拘管遇赦還軍前自効有功並叙復元受軍職史嵩之露布告金亡謹遣郭春按循故壤詣奉先縣汎掃祖宗諸陵還師屯信陽命王旻守隨州王安國守棗陽蔣成守光化楊恢守均並益兵飭備經理唐鄧屯田二月辛未監察御史洪咨夔言上親政之始斥逐李知孝梁成大其謫事權姦黨私罔上倡淫黷貨罪大罰輕詔李知孝削一

秩罷祠梁成大削兩秩壬申以趙彥呐為四川安撫制
置使兼知興元府丁亥詔端平元年正月以前諸命官
貶竄物故者許令歸葬三月己酉以賈涉子似道為籍
田令辛酉詔遣太常寺主簿朱楊祖閣門祇候林拓詣
洛陽省謁八陵四月辛未詔遣朱復之詣八陵相度脩
奉丁丑詔比年宗親貧窶或致失所甚非國家睦族之
意大宗正司南外西外宗正司其中嚴州郡以時贍給
違者有刑監察御史王遂言史嵩之本不知兵矜功自

侈謀身詭秘欺君誤國留之襄陽一日則有一日之憂
不報戊寅歲星守太微垣上相星壬午監察御史洪咨
夔言今殘金雖滅隣國方彊益嚴守備尤恐不逮豈可
動色相賀渙然解體以重方來之憂上嘉納甲申日生
赤暈丙戌以減金獲其主完顏守緒遺骨告太廟其玉
寶法物并俘囚張天綱完顏好海等命有司審實以聞
庚寅詔授孟珙帶御器械京襄部押官屬陳一薦江海
官兩轉餘論功行賞金降人夾谷奴婢改姓同名鼎王

聞顯呼延寔來伯友石大瑞白華各授官有差丁酉臣僚言江淮荆襄諸路都大提點坑冶吳淵恃才貪虐籍人家貲以數百萬計掩為已有其弟潛違道干譽任用非類詔吳淵落右文殿脩撰吳潛落祕閣脩撰並放罷五月庚子極卒贈少師戊申太平州螟己酉太陰入氏乙卯詔李知孝瑞州居住梁成大潮州居住吳澤南康軍居住並再降授官尋盡追爵秩詔魏了翁赴闕丙辰以趙范為兩淮制置使節州軍馬兼沿江制置副使壬

戊以崔與之為端明殿學士提舉西京嵩山崇福宮陳
韓權工部尚書知隆興府江西安撫使丙寅詔黃幹李
燔李道傳陳宓樓昉徐宣胡夢昱皆阨於權姦而各行
其志沒齒無怨其賜諡復官優贈存恤仍各錄用其子
以旌忠義戴埴其復元資以勵士風建陽縣盜發衆數
千人焚劫邵武麻沙長平六月戊辰朔鄭清之等進奏
選德殿柱有金書六字曰毋不敬思無邪上曰此坐右
銘也庚午熒惑填星合于胃壬申詔蠲漳泉興化三州

丁未錢丙子以李鳴復為侍御史兼侍講戊寅以喬行簡知樞密院事曾從龍參知政事鄭性之簽書樞密院事陳貴誼兼同知樞密院事己卯詔故巴陵縣公竑可盡復本身官爵有司其檢視墓域以時致祭妻吳昨自請為尼特賜慧淨法空大師紹興府月給衣資緡錢詔殿司選精銳千人命統制婁拱統領楊辛討捕建陽縣盜辛巳詔故端明殿學士開府儀同三司史彌遠贈資政殿大學士諡忠宣熒惑犯填星丙戌有流星大如太

白戊子日暈不匝生格氣癸巳史嵩之進兵部尚書禁
毀銅錢作器用并貿易下海秋七月乙巳詔嘉興縣王
臨年百二歲補廸功郎致仕八月癸酉詔河南新復郡
縣久廢播種民甚艱食江淮制司其發米麥百萬石往
濟歸附軍民仍榜諭開封應天河南三京甲戌朱楊祖
林柘朝謁八陵回以圖進上問諸陵相去幾何及陵前
澗水新復楊祖悉以對上忍涕太息乙亥以趙范為京
河關陝宣撫使知開封府東京留守趙葵京河制置使

知應天府南京留守金子才關陝制置使知河南府西
京留守甲午權邵武軍王埜以平建陽寇有功官兩轉
餘推賞有差九月庚子趙范依舊京西湖北安撫制置
大使知襄陽府辛丑熒惑入井壬寅趙范言趙葵金子
才輕遣偏師復西京趙楷劉子澄參贊失計師退無律
致後陣敗覆詔趙葵削一秩措置河南京東營田邊備
金子才削一秩措置唐鄧息營田邊備劉子澄趙楷並
削三秩放罷又言楊義一軍之敗皆由徐敏子范用吉

怠於赴援致不能支詔范用吉降武翼郎徐敏子削三
秩放罷楊義削四秩勒停自效己酉真德秀言權臣罔
上講筵官亦傳會其言今承其弊有當慮者五事并及
泉漳寇盜鹽法之弊帝嘉納之詔進士何霆編類朱熹
解注文字有補經筵授上文學冬十月己卯真德秀進
太學衍義辛卯陳貴誼薨贈少保十一月壬子京湖制
司初鎮北軍詔以襄陽府駐劄御前忠衛軍為名壬戌
太白經天十二月己卯大元遣王檝來戊子王檝辭于

後殿辛卯遣鄒伸之李復禮喬仕安劉溥報謝各進二
秩

宋史卷四十一